

四庫全書

子部

欽定四庫全書

子部

雙橋隨筆卷十一

詳校官中書臣潘有為

編修臣倉聖脉覆勘

總校官進士臣繆琪

校對官中書臣葉葵

謄錄監生臣周丕

欽定四庫全書

雙橋隨筆卷十一

鳳縣知縣周召撰

晉徐藻妻陳氏與妹劉氏書有云老莊者絕聖棄智渾  
齊萬物等貴賤忘哀樂非經典所貴名教所取何必輒  
引以為喻耶陳筭帷弱質也人引老莊以為喻猶然不  
滿况鬚眉如戟者四子五經置之不問而日與方外之  
流說無生話商出世事何其謬乎昔人遺人以巾幘謂

其不異婦人耳而不知婦人中固有尊經典而崇名教  
識見卓卓如是者而峩冠博帶之士所見乃出於其下  
真不可解也

楊炯詩寧為百夫長勝作一書生大凡多事之世兜鍪  
跋扈氣壓儒冠遂使人有投筆之嘆敢云挽一石弓不  
如識一丁字耶吾衢士子當呼天搶地時喪氣極矣而  
猶賴制臺李公多方培植之力今夏歲試既嚴冒籍之  
禁而新生之進謁者至於命坐賜茶從容款語夫督府

至尊嚴也。碧油幢下有若天帝雲君，豈容望見而公之優禮士人破格如是？擐甲之衆，詫以為榮。至有遇子衿而讓道以馳者。古之大臣擁麾出鎮，多事威稜，求如公者，指難多屈。蓋兵戈擾攘中，鄒魯欲衰之緒，藉以維持於不墜，其有裨於斯文者，非淺鮮矣。

明三原王公之子，自三原來京省，公只如貧士止騎驟。又公女適宋監生者，只乘兩人轎，嘗以銀二兩託雲南張鳳知印買寶石，叮嚀切勿使公知之。其家教如此。又

河南耿公裕為禮部尚書時嘗曰吾暮自部歸必經過三原之門見其老蒼頭每持秤買油吾自入仕未嘗買油故每過輒面城而行蓋媿之也

需者事之賊也羅景倫云大凡舉事經捷則易成繁重則難濟春秋時宋人殺楚使者楚子聞之投袂而起屢及於室皇劔及於寢門之外車及於蒲胥之市何其輕捷也又管仲規桓公云人君惟優與不敏為不可優則亡衆不敏不及事余性最喜勤敏常慮兒輩以遲緩廢

務令書此語於座以代佩弦

江山賊據一婦入營欲犯之不屈死焉留七言絕六首  
於壁賊破後有見而錄之者僅存其半詩云欲將脆骨  
抵狂瀾禍到全身死不難寸縷芳魂何所寄一輪秋月  
照孤巒拌命非無骨肉恩妾身寧肯苟污存誰憐薄命  
存家信含淚難禁帶刃吞擡頭猶見燕成窩怨妾無家  
可若何一死身輕誰為殯好將白骨葬清波婦常山人  
也當此白刃如霜人人茅靡之際而從容就義出於婦

人雖寥寥數語衝口而出堪與日月爭光矣又一女未  
笄為賊所驅自投於井而死亦常山人一邑二事可謂  
競爽惜無從稽其氏族俾採風者並旌其閭以慰重泉  
之意耳雖然亂離以來賊衆狂逞一時貞媛烈士殞命  
於瀾翻鼎沸之中者不知凡幾又豈獨一二人湮沒不  
傳也哉

朱文公與慶國卓夫人書云聞尊意欲為五哥經營幹  
官差遣某竊以為不可人家子弟多因此壞却心性盖



其生長富貴本不知艱難一旦仕宦便為此官只有使  
長一人可相拘轄又多寬厚長者不欲以法度見繩上  
無職事了辦之責下無吏民繫繫之憂而州縣守令勢  
反出已下可以陵轢故後生子弟為此官者無不傲慢  
縱恣觸事懵然愚意以為可且為營一稍在人下職事  
喫人打罵差遣乃所以成就之若必欲與求幹官乃是  
置之有過之地誤其終身讀此簡仰見先生愛人以德  
之心真懇若是後生小子能時時讀之味之其裨於身

心不小也

屠緯真在京與人書有云遙想江村夕陽漁舟投浦反  
照入林沙明如雪花下曬網罟酒家白板青帘掩映垂  
柳老翁挈魚提瓮出柴門絕勝長安騎馬衝泥也又云  
每當馬上千騎颯沓掘堞紛紜僕自逍遙仰視雲空寄  
興寥廓踟躕少選而詩成矣又云足下任清淮渡口烟  
銷月出水綠霞紅距風沙之地萬里而書來佗僚殊不  
自得何也數言寫景不啻書中有畫但蕭颯之意殊不

是戴紗帽人語先生雖溷跡軟紅塵內而興味清虛有雲中白鶴之致味其言真熱鬧場中一帖清涼散也

王陽明少時有童子師督令習走負兩磚於牕間令行十步久之能勝又各益一磚足背皆腫不令得息腫平痛止去磚而行往來如飛此即陶士行朝夕運甕之意而此師亦非尋常學究也心知陽明之不凡而慮其筋骨脆弱不堪勞瘁使之習焉而無所畏雖經百折而氣不衰矣圯上老人之於張子房亦然一在斂其鋒稜一

在堅其骨力同一意見也

黃鐸字希聲永樂中鄉貢舉人授徒崑山從之學者三日不授書惟命以正立必欲堅不動或怪以為問曰讀書易耳為人難苟坐立未當他何望焉識者以為善教明王紳字仲縉學士禕之子年十三宋濂一見奇之曰華川有子蜀王禮聘教授蜀郡痛父遺骸未返丘壟白王走雲南慟哭行求不能得即奠死所仰天一號幾絕滇人感愴稱王孝子雲南布政使張紱重紳孝為作弔

王翰林文子徐字叔豐有志行壯力問學性至孝紳痛  
念父沒食不兼味徐遵教子孫相承數十年不變父母  
喪三年酒肉不入口及卒門人私謚曰孝莊先生人謂  
之王文節不但有子且有孫凡人家門可表又不在科  
名勢位之際也

霍光欲以女妻雋不疑不疑固辭不肖當久之病免又  
欲以女妻劉德德亦固辭慮其盛滿後免為庶人屏居  
田間當光為大將軍時禍福之權在其掌握氣燄所薰

何止炙手一時倚氷附火之輩須其盼睐方且奔走營謀惟恐不得況一旦妻之以女為門中嬌客乎兩公乃於炎炎方熾時避而遠之雖遭屏棄而不悔其高識遠見何如也范明友誤墜錦繡囊中遂與其禍人生世上盈虛消息之理蓋可忽乎哉

趙閱道先生諡清獻趙挺之亦諡清獻氏族大全因兩公姓諡之同遂誤以趙明誠為閱道子而曰公二子岵明誠不知明誠蓋挺之子也又云李易安趙抃之子明

誠妻也其舛誤至此凡紀載之書如此類者不少不可不知又憶曾於某書中見有分別兩公混傳之故者似以挺之之獻為憲恨老人善忘而羣書又散失無可考聊記於此以族好古者正之明誠夫婦前後金石錄序甚佳

程伊川葬說云卜其宅兆卜其地之美惡也非陰陽家所謂禍福者也地之美者則其神靈安子孫盛若培植其根而枝葉茂理固然矣地之惡者則反是然則曷為

地之美者土色之光潤草木之茂盛乃其驗也父祖子孫同氣彼安則此安彼危則此危亦其理也而拘忌者或以擇地之方位決日之吉凶不亦泥乎甚者不以奉先為計而專以利後為圖尤非孝子安厝之用心也惟五患者不得不慎須使異日不為道路不為城郭不為溝池不為貴勢所奪不為耕犁所及五患既除則又鑿池必四五丈遇石必更穿之防水潤也既葬則以松脂塗棺石灰封墓門此其大畧也若夫精畫則又在審思



慮矣其各葬者出不得已後不可遷就同葬至於年祀  
寢遠高曾不辨亦在盡誠各具棺槨葬之不須假夢寐  
著龜而決也葬之穴尊者居中左昭右穆而次後則或  
東或西亦左右相對而啟穴也出母不合葬亦不合祭  
棄女還家以殤穴葬之呂和叔喪說云詩曰凡民有喪  
匍匐救之不謂死者可救而復生謂生者或不救而死  
也夫孝子之喪親不能食者三日其哭不絕聲既病矣  
杖而後起問而後言其惻怛之心痛疾之意在不欲生

則思慮所及雖大事有不能周之者而況他哉故親戚僚友鄉黨聞之而往者不但弔死而已莫不為之致力焉始則置賻襚以周其急三日則共糜粥以扶其羸每奠則執其禮將葬則助其事其從柩也少者執紼長者專進止其掩壙也壯者盈坎老者從反哭袒而賙焉不足則贈焉不足則賻焉而凡有事則相焉斯可謂能救之矣故適有喪者之詞不曰願見而曰敢見雖國君之臨亦曰寡君承事他國之使者曰寡君使某母敢視賓客

主人見賓不以尊卑貴賤莫不拜之明所以謝之且自別於常主也賓見主人無有答其拜者所以助之且自別於常賓也自先王之禮壞後世雖傳其名數而行之者多失其義喪主之待賓也如常主喪賓之見主人也如常賓如常賓故止於弔哭而莫敢與其事如常主故舍其哀而為衣服飲食以奉之其甚者至於損奉終之禮以謝賓之勤廢弔哀之儀以寬主之費由是則先王之禮意其可以下而已乎今欲行之者雖未得盡如禮

至於始喪則哭之有事則奠之又能以力之所及為營  
喪事之未具者以應其求擇子弟僕隸之能幹者以助  
其役易紙幣壺酒之奠以為禭除供帳饋食之祭以為  
賄與賻凡喪為之待已者悉以他辭受焉庶幾其可也  
宋子京治戒云吾沒稱家之有無以治喪殮用濯浣之  
衣鶴氅裘紗帽綫履三日棺三月葬謹無為流俗陰陽  
拘忌也棺用雜木漆其四會三塗即便止數十年足以  
腊吾骸朽衣巾而已吾之孑然蒿然皦皦有識者還於

造物放之太虛可腐敗者合於黃壚下付無窮吾尚何  
患掘塚深三丈小為冢室劣取容棺及明器左置明水  
二盆酒二缸右置米麴二奩朝服一稱鞞履自副左刻  
吾誌右刻吾銘即掩壙惟簡儉無以金銅雜物置塚中  
吾學不名家文章僅及中人不足垂後為吏在良二千  
石下猶可容數人無功於國無惠於人不足以請謚於  
有司不可受贈典又不宜求鉅公作誌及碑塚上植五  
株栢墳高三尺石翁仲它獸不得用蓋自標置者非千

載永安計耳母作道佛二家齋醮此吾生平所志若等不可違命作之違命作之是死吾也是以吾為遂無知也葬之日以繪布纏棺而妻引母作方相俑人陳列衣服器用累吾之儉吾平生語言無過人者謹無妄編綴作集使後世嗤詆吾也吾侍上講勸凡十七年上頗記吾面目姓名然身後不得丐恩澤為無厭事若等兄弟十四人惟二孺兒未仕此以諉莒公莒公在若等為不孤矣若等兄弟雖有異母者古人謂四海之內皆為兄

弟况兄弟之不懷求合他人人詎肯信哉縱陽合之彼  
應笑且憎也若等視吾事莒公如何莒公友吾云何可  
以為法矣人不可以無學至於奏議箋記隨宜為之天  
分自有所稟不可強也要得數百卷書在胸中則不為  
人所輕誚矣右錄三先生三篇皆人子慎終追遠之語  
以示兒輩使余異日易簀後兼覓文公家禮斟酌行之  
大約必以朴儉為主不但我家貧薄無力從時且能順  
我生平最所厭惡之舉而盡去之九原之下暢快實甚

苟讀聖賢書而知遵其訓不落婦人女子販負屠沽之見者必不以余言為可置也

王槐野先生諱維楨華陰人也為人戇直朴畧自謂受性已定猶僕之貌修幹廣額昂首軒眉揭膺闊步皆造化陶冶不可移易又云西子者里之姣好人也一日西子痛心疾乃捧心而顰觀者益以為艷其里婦慕之亦捧心而顰家人見之詫曰此固吾家婦奈何倏而化為鬼也今令僕守吾素即不投俗猶自稱人變之則化為



鬼家人駭矣僕即死不願也其自信不移如此故其與  
浙江趙巡按姜僉事二書因海寇之亂直陳時弊激切  
痛快皆他人所不能道所不敢道者真救時之藥石也  
余於范月工架上得其集讀之謂其為文多右正嫉邪  
揚嫩刺惡時抉胃臆以匱不平曲為引譬言以發奇思真  
所謂擲地有聲入土不蠹者不但詞句之沉雄軼蕩令  
人避三舍也

唐太宗太子冠有司言二月吉請造兵符儀仗太宗曰

東作方興宜改用十月蕭瑀奏據陰陽書不若二月太宗曰吉凶在人若動依陰陽不顧禮義吉可得乎循正而行自與吉會農時急務不可失也太宗英明其見理若是後世之人圖謀吉利瑣瑣於占時擇日而於禮義有不知為何物者何其昏瞶之甚也

宋孟珙屯黃州邊民來歸者日以千數為屋三萬間以居之厚加賑貸又慮軍民雜處因於高阜為齊安鎮淮二砦以居諸軍二事有裨於民生者不淺在今日惟我

督臺李公有之既構屋以處難民又於沿城空地多建營房殘民初集得免鳩居之擾自軍興以來大江以南如杜詩所謂各使蒼生有環堵未有若吾西安者也

商鞅立法舍人無驢者坐之及公子虔之徒告商君欲反發吏捕鞅鞅亡至關下欲舍客舍舍人不知其為鞅也曰商君之法舍人無驢者坐之鞅喟然嘆曰為法自斃一至此哉唐武后命來俊臣鞠周興獄俊臣與興方推事對食謂興曰囚多不承當用何法興曰此甚易耳

取大甕以炭四周炙之令囚入其中何事不承俊臣索大甕如興法起謂興曰有內狀推兄請入此甕路巖為相密奏臣下有罪賜死者令使者剔取結喉三寸以進驗其實至賜巖死乃自羅其酷五代時閩薛文傑以古制檻車踈闊更為之形如木櫃攢以鐵鋸內向動輒觸之既成而適以衆怒檻車送文傑於軍前首自入焉武后盛開告密有魚保家者請鑄銅為匭以受天下密奏其器一室四隔上各有竅可入不可出后善之未幾其

怨家投匭告保家嘗為徐敬業作兵器遂伏誅宋盧多  
遜貶珠崖李苻知開封府言於趙韓王曰珠崖雖在海  
外而水土無他惡貶者多生全春州在內地而近至者  
必死望追改前命亦外示寬貸而置於必死之地趙頷  
之月餘苻坐事貶宣州行軍司馬上怒未已令再貶嶺  
外趙具述其事即以苻知春州到郡月餘而卒此六人  
皆所謂為法自斃者惡人之報如是始快人心始彰天  
理

南唐邊鎬初從查文徽克建州凡所俘獲皆全之建人謂之邊佛子及克潭州市不易肆潭人謂之邊菩薩既而政無紀綱惟日設齋供盛修佛寺潭人失望謂之邊和尚

元盧世榮入中書即日奏詔理鈔法之弊自謂其生財有法用其法當賦倍增而民不擾翰林學士董文用謂曰此錢取於右丞家耶將取之民耶取於右丞家則吾不知若取於民則有說矣牧羊者歲常兩剪其毛今牧

人日剪以獻主者固悅其得毛之多然羊無以避寒熱  
既死且盡毛又可得乎民財有限右丞將盡取之得毋  
有日剪其毛之患乎世榮不能對從來重賦之喻未有  
精於此言者

雙橋隨筆卷十一



欽定四庫全書

雙橋隨筆卷十二

鳳縣知縣周召撰

愛敬以養生哀戚以送死墓焉而葬位焉而祭皆本於禮而不可忽者先王教民之通法也喪而用浮屠之術墓而信葬師之說資冥報於不可致詰之間徵休咎于無情難驗之川阜上以為親謀下以為身利者此古之所未聞也後世閭夫野人多趨信而甘心焉親沒於床

不於禮而於浮屠不哭泣擗踊而於鍾磬鐃鼓非是之  
務則人交笑以為簡時可葬矣泥於山川之利否而不  
即葬或至於終身或身死而遺榱於子孫甚者子孫恐  
葬之禍其身舉而棄之水火葬親以禮者世反非之為  
愚嗚乎是何其不察而至於此極乎彼浮屠之所謂輪  
迴者果可信耶天之生人物者二氣五行也其運也無  
窮其續也無端先者過而後者來未嘗相資以為用者  
二氣五行之常也自草木而觀之發榮於春盛壯奮長

蔚乎而不可遏及乎戒之以凜風申之以霜露昔之沃  
澤茂長一旦飄而為浮埃化而為汙泥生理殫盡跡可  
窺矣其發生於明年者氣之始至者為之也豈復資既  
殞之餘榮惟人也亦然得氣而生氣既盡而死死則不  
復有知矣苟有焚炙剗割佚樂適意身且不有而何以  
受之形盡氣盡而魂升魄降無所不盡安能入人胷腹  
重生於世而謂之輪迴也哉天地至神之氣以其流行  
不窮故久而常新變而不同使必資已死之人為將生

之本則造化之道息矣烏足為天地倘或有之人固不知之也浮屠亦人耳何自而獨知之彼以其茫昧不可揣索故妄言以誣世夫豈可信而事其教乎孔子謂祭之以禮為孝則事異端之妄棄聖典而不信者其為非禮也大矣不孝孰加焉而闇者固安之而不以為非胡可哉葬師之動人以禍福其說尤怪人之昌隆盛熾者其先必有厚德之遺賤貧夭絕者必有餘惡之著山川何與焉誕者則不然聞有富貴之人於此則歸福於塋

塚曰此某形也此某徵也於葬之法宜爾也聞有貧賤之人于此則曰此葬之罪也此於法宜至於斯者也信斯言也彼人之多財而力足者皆相率而為不善及乎死也求善地以葬其身則可免子孫於禍夫孰肯為善乎由大而論之係乎盛衰者莫大於國都穀函河渭無異也秦帝之亡漢帝之昌隋據之而促唐據之而長果在於善地乎帝王之尊家天下而役海內使地善而可興竭智以營陵廟奚求而不致而亡國敗主相屬則果

不在乎此也審矣古之卜宅兆云者以神道定民志也  
非視岡阜之向背順逆臆度目斷如世之葬師之為也  
葬師祖晉郭璞書其書苟可信璞用之以葬其祖者宜  
有奇驗不誣而璞卒死於篡賊其身不能福而謂能福  
乎人其可信否耶世之人多信之不知自陷於不肖而  
莫之贖也嗚乎先王之禮一失而流於野再壞而化於  
異暨其大壞而不可為忽乎入於禽獸而不之覺也寧  
不哀哉自今而往吾不能知其所至矣其心浸淫膠固

非空言所能草也吾獨以告吾族人親喪必以三年三年之制必循禮勿以浮屠從事違者生罰之死不祠於先祠葬卜吉凶而勿泥於葬師之說期必以三月三月不能至五月五月不能至七月過一歲者如違喪禮之罰必刻壙誌墓銘力不足者刻其名俾後有考作方氏喪葬儀此明方正學先生宗儀九則之一也浮屠葬師之說余所深惡每欲暢言其謬而筆端庸繭不能盡先生此篇深切著明人人可曉真有家者所宜取法其有

裨于人心風俗非淺鮮也九則其八曰尊祖曰重譜  
曰睦族曰廣睦曰務學曰謹行曰修德曰體仁余皆奉  
以為訓而另錄是編於此者浮屠葬師之害浸淫膠固  
雖名流鉅公亦多信之而不以為非不揣於雜錄中妄  
陳末議今得先生以為助則孤掌之鳴可不甚畏故載  
於筆者不憚再三耳已又得劉伯溫先生書劉禹疇孝  
行傳後語亦可以見浮屠之謬並錄焉閱之者當益信  
也



浮屠之術果何道而能使人信奉之若是哉人情莫不  
好安樂而惡憂患故揣之必於其所恒懼誘之必於其  
所恒願然後不待驅而自赴浮屠設為禍福之說其亦  
巧於致人與夫四海之衆林林也而無不為其所致何  
哉彼固非止於惑愚昧已也人情無不愛其親親沒矣  
哀痛之情未置而謂冥冥之中欲加以罪孰不惕然而  
動於其中哉間有疑焉則羣咻之若目見其死者拘於  
囹圄受箠撻而望救者故中材之人莫不波馳而蟻附

雖有篤行守道之親則亦文致其罪以告哀於土偶木  
俑之前彼固自以為孝而不知其為大不孝豈不哀哉  
且彼謂戕物者必償其死故有牛馬羊豕蛇虺之獄謂  
天下之蠢動者舉不可殺也今夫虎豹鷹鷂搏擊飛走  
以食日不知其幾何而獨無罪也哉人之殺物有獄矣  
虎豹食人而無獄何其重禽獸而輕人也彼又謂婦人  
之育子者必有大罪故兒女子尤篤信其說以致愚於  
其母吾不知司是獄者誰與人必有母將舍其母而獄

人之母歟將并其母而獄之歟獄其母不孝舍其母而  
獄人之母不公不孝不公俱不可以令二者必一居焉  
將見羣起而攻之矣雖有獄誰與治之宰天地者帝也  
彼則謂有佛焉至論佛之所為响响嘔嘔若老婦然有  
呼而求救不論是非雖窮凶極惡無不引手援之使有  
罪者勿懷刑是以情破法也夫法出於帝而佛破之是  
自獲罪於天也吾知其無是事也昭昭矣以劉子之賢  
其不為所惑無足怪者吾獨悲夫天下之為劉子者不

多也故又為之言以悟夫知愛其親而不知道者雖然  
今之羣相尊奉而不知厭者又不過尚虛華粧體面及  
勉強支撐以了故事而已求其慮親於冥冥之中有加  
以罪而惕然動念者又不可得矣悲夫

王百谷先生作吳社編顧文學雲龍又遺書補其所未  
脩蓋皆憤俗憂時之語也吾鄉最稱寒瘠而邇來俗尚  
競趨華靡雖當兵燹之餘救死不贍而編中所嫉喜謔  
尚怪輕人道而重鬼神諸陋習亦皆有之舉國譁張若

飲狂藥余無力挽回不勝杞人之慮錄編之前後語及  
顧書附雜記中冀兒輩省覽倘有欲正人心息邪說距  
詖行放淫詞以維持吾道如孟夫子者乎當不訾余以  
為忤俗也

里社之說所以祈年穀禱災祲洽黨里樂太平而已吳  
風淫靡喜譌尚怪輕人道而重鬼神舍醫藥而從巫覡  
毀宗廟而建淫祠黜祖禰而尊野厲嗚乎弊也久矣每  
春夏之交妄言神降於是游手逐末亡賴不逞之徒張

皇其事亂市井之聽惑稚狂之見朱門纓纓之士白首  
耄耄之老草莽縛笠之夫建牙羆虎之客紅顏窈窕之  
媛無不驚心奪志移聲動色金錢玉帛川委雲輸百戲  
羅列威儀雜遝啟僭竊之心滋姦慝之行長爭鬪之風  
決奢淫之漸潰三尺之防廢四民之業嗟乎是社之流  
生禍也昔郭代公戮豕烏氏之妖亡西門豹沉巫河伯  
之害息今之長民者不是之問豈所謂魯人獵較孔子  
亦獵較歟不然是或一道也吾儕小人不可知也已

王百

谷吳社  
編序

百谷信奇材也可畏哉吳社編之作非徒摘藻適情而已蓋有憫時之懷先事之慮焉他日柄用其所設施而展布者具見之矣第編中一二未盡敢畧陳之出武庫之戈矛用公家之甲冑青衣行酒何等事乎而演之於承平之世昭君出塞胡爲然也而效之於熙靖之朝手搏爭勝何止數輩會首醜財不啻千金輿木偶而入人之門恣所要求假神威以懲人之慢僞張維繫甚者郡倖

出遊迴車讓道幕僚入請行令戒途此有以滋無忌者之心而來欲逞者之計未幾則盜發附郭之民家禍作嚴城之官室矣憶得往年嘗一舉之不旋踵既兆島夷之變此固有識者之所寒心也近者鄉達老成閉扃門巷不容入里是即百谷之心焉耳賤子慚無馬遷記事之才徒抱杞人憂天之戚幸以愚言轉致作者使潤色而增損之聞之當道必有讀未終篇推案而起者矣今夫儒服而賊夫儒者有三一曰畔儒樹二氏之幟以



簫鼓喜名矜異之士謂其道玄妙無上而孔孟之言特  
詳於下學云爾此白晝大都操戈入室而無復忌憚者  
也一曰間儒以先聖之道不可易也二氏之說不可勝  
也合而一之姑以惑世使學者無深拒焉而且駁駁入  
於其中而不覺此策士所謂辭卑而進為二氏間者也  
一曰竊儒陽稱孔孟之學而陰宗二氏之旨指之曰禪  
則深避其名而厭然掩之其徒從而推之曰此聖學正  
脉也二氏之道去聖學非遠也所異者幾希之間耳此

以詩禮發冢行之暮夜而憎東方之明者也斯三者其說盈於天下矣春秋之作非惡儒也惡儒而異者也孔子曰攻乎異端斯害也已異端之害猶可言也儒而異異而儒其害何可言也

語曰家有常業雖飢不餓夫無常業游民也豈惟不免於餓放僻邪侈無不至而刑戮隨之矣古之君子帶經而鋤負薪而讀固貧者之業也奚足恥也士而恥貧不足以為士矣貧而無業不可以為人也

郁離子言人而不死則天地間無所容人矣死而皆為鬼則天地間無所容鬼矣乃人之言金丹不死者非獨庸人也高明名士多好之或傾家亡身而不悟淫祀求福非獨婦人也縉紳大夫篤信之乃願為僧巫輩嚆矢而不辭彼亦何至於是哉由學術不明人心不正而利之陷溺人一塵之眯目遂不見嵩華耳

蘭江章文懿公天性朴誠其家居每歲請門生二次清明一次冬至一次皆其祭先之福物也兩人共一席有

不至者文懿自專一席狼餐而盡若門生續至則夫人自來益之夫人平日與門生皆相見文懿他時只蔬食初非矯強亦無意必其朴誠之性以為有則喫無則已順其自然適當如是而止耳以視後來仕宦之家其奢與儉何啻霄壤文懿移居城中宅後有天福山一日本縣有勾攝一罪犯經文懿門前過逕走入其家從天福山逸去差人在文懿家作閹謂藏匿此文懿令其至內尋索差人直進臥房遍尋不見亦從後門上天福山

追趕而去文懿與夫人畧不動色焉

張安世家僮數百人皆有技業虞宗治家富殖以奴婢無游手可法哉余以為子弟甚多尚有賢與不肖之可慮况家僮數百乎省事不如省官必汰其狡黠而恣肆者用其謹朴而誠厚者可也

唐徐敬業世勳孫也勸慮其狡猾必覆宗偵其出獵縱火焚之敬業即殺其所乘馬匿腹中浴血而出後以失職怨望起兵討武氏兵敗而死宋胡明仲寅康侯弟之

子少桀黠難制父閑之空閣閣有雜木寅盡刻為人形  
康侯曰當有以移其心別著書數千卷於其上年餘寅  
悉成誦不遺一卷後為有宋名儒兩人皆以少年時駘  
宕不羈為祖父所憂而其後來結局相異如此所以然  
者寅為儒門子弟習見夫詩書禮義之容一變至道家  
訓使然若敬業目中惟乃祖軍中戰鬪攻取事耳而世  
勸阿旨立武壘為后幾覆唐宗雖病中以子孫付弟之  
言不為不正僨轅之報又何能免人生世上父兄之教

盖可忽乎哉

程明道兄弟游成都見治篋籀桶者挾冊就視之則易也篋者曰若嘗學此乎因指未濟男之窮以發問二程遜而問之曰三陽皆失位後閩人袁滋入洛問易於伊川伊川曰易學在蜀盍往求之滋入蜀見賣醬薛翁於叩眉間與語大有所得尚有郭曩氏及譙定與篋叟醬翁皆隱君子也

李凝齋曰文與可畫竹是竹之左氏也子瞻却類莊子

又有息齋李衍者亦以竹名所謂東坡之竹妙而不實  
息齋之竹真而不妙者是也梅道人始究極其變流傳  
既久真贋雜錯徐文長云梅花道人畫竹如羣鳳為鶻  
所掠翎羽騰閃捎揜變滅之詭雖鳳亦不得而知余偶  
獲道人真蹟秘為至寶不意竟失於兵火令人悵恨無  
已茲錄兩公評語當怦怦不釋時揭而讀之庶使當日  
淋漓走筆之狀彷彿在吾目中聊以自慰耳

造物之理有不可解者吾鄉航埠下洲一帶以木奴為



利然必為之澆灌修剔其實始繁今秋其地鞠為茂草而蓬蒿滿目中仍有橙黃橘綠之景一可異也稻麥及菽不種而生穎而粟者至於如墉如櫛遺稊滯穗少為難民之利二可異也或以為上天好生無盡殺之故而余以為不然天果好生則意在不殺何待於盡且天果好生則宜止殺而止殺之道在多生好生之人而不生嗜殺之人蓋嗜殺之人少則天下皆得其生矣好生之人多則天下皆免乎殺矣故曰願人常行好事願天常

生好人不此之務而喜兵好亂實繁有徒聽其磨牙蝕  
舌殺人如麻而莫之禁於是死者肝腦塗地生者家室  
流離然後乃出其奇以拯於燼消漸滅之餘天亦可謂  
惠而不知為政矣或又以為劫運所逢天亦無奈子何  
怨之深也余曰詩云昊天不傭降此鞠凶昊天不惠降  
此大戾又云謂天蓋高不敢不跼謂地蓋厚不敢不蹐  
盖人有疾苦未嘗不呼天也如其有路余將不避虎豹  
之關而問之奚其怨

沈維時石田之子也性嗜古器物書畫遇名品摩撫諦  
玩喜見顏色往往傾橐購之菑畚所入足以資是縹囊  
緗帙爛然充室而襲藏惟謹對客手自展列不欲一示  
非人至尋核歲月甄品精駁厯厯有據江南賞鑒家咸  
推之又喜積書讐勘勤劇曰後人視非貨財必不易散  
萬一能讀則吾所遺厚矣錢孔周所與遊唐伯虎徐昌  
穀湯子重王履約履結文徵仲室廬靚深嘉禾秀野性  
喜蓄書每併金懸購故所積甚富山經地誌稗官小說

無所不有遇有所得隨手劄記積數巨帙文先生極重之寫贈碧梧高士圖兩公皆吳人雅人深致迄今相見如對清泉白石令人滓穢俱消黃山谷云世人惟俗不可醫余謂書兩公事為一紙燒成一劑用佳茗送下或可以療但恐已入膏肓縱有純灰十斛不能若頭風之易愈耳

宋羅景綸先生有方寸地說取俗語但存方寸地留與子孫耕二句而衍之也其言親切而有味載所著鶴林

玉露中併其全集皆堪諷覽

西家之東即東家之西我往彼亡紂以甲子亡周不以甲子興乎卜以決疑不疑何卜事之可否當斷于心何以禱為為此言者曾如鏡眼如電膽如箕不假思維衝口而出有斬釘截鐵解牛破竹之力彼青鳥赤庭家雖有百喙於何處更進一語

帝王之興以德為瑞而不在於星雲海嶽鳥獸草木之奇自昔人好異而有流虹繞電麟遊鳳巢草生魚躍等

語記事之家不能削去益滋後世虛誣誕妄之習而草澤之間且有假其事以惑愚民而成亂階者善乎劉子玄史通之論書事也曰祥瑞之出非闕理亂蓋主上所惑臣下所欺故德彌少而祥彌多政愈劣而祥愈盛是以桓靈受祉比文景而為豐劉石應符比曹馬而益倍史官徵其謬說錄彼邪言真偽莫分是非無別其煩一也蓋說瑞稱祥其謬易見而從古及今鮮有一斥其非者子玄之論豈非千古卓識

黃山谷與其甥洪駒父書有云尺璧之陰常以三分之一治家以其一讀書以其一為棋酒公私皆辦矣黃長吉曰公私皆辦語殊近情使人躍從而余以為最易誤人之語也蓋子弟資性中下者多終朝閉戶尚恐坐馳況於飲酒著棋乎邇有一擢高第者先是曾以優為戲一時少年輩不問其人學殖何似也棘闈乍蹶輒謂取科第無事嘔心但如某者止以豪華跌宕之氣掇若承蜩耳於是與卷帙漸踈至於流蕩而忘返而其蹭蹬不

得志也日益甚然則山谷之意以駒父之天分高而識力定雖分其功於棋酒而不受其累觀其目之為江南千里駒可見矣故其言如是苟非其人而又有家棟之責則一日之內繼之以夜以一分治家二分讀書棋酒之興偶一為之餘皆閉目與口勿貽濡首之悔可也

張魯祖陵客蜀學道鵠鳴山中造作道書以惑百姓從受道者出五斗米故世號米賊陵死子衡行其道衡死魯復行之攄漢中以鬼道教民自號師君孫恩世奉五



斗米道叔父泰師事杜子恭有秘術泰伏誅恩逃入海  
衆聞泰死皆以為蟬蛻登仙故就海中資給恩恩寇臨  
海為太守辛景所破窮蹙自投於海而死妖党及妓妾  
等皆謂之水仙從死者以百數隋宋賢善為幻術自稱  
彌勒出世每夜樓上有光明能變作佛形又懸大鏡於  
堂上素紙上畫為蛇為獸及人形有來禮謁者轉側其  
鏡遣觀來生形像或映見紙上蛇形子賢輒告云此罪  
業也當更禮念又令禮謁乃更人形示之遠近惑信日

數千百人遂潛謀作亂將為無遮佛會因舉兵欲擊乘  
輿事泄鷹揚即將以兵捕之夜至其所遶其所居但見  
火坑兵不敢進即將曰此地素無坑止妖妄耳及進無  
復火矣遂擒斬之以上諸賊自古及今往往有之而愚  
者為其所惑遂至狍猖有御民之任者所宜防微杜漸  
嚴行左道之禁止亂在於未形其功較易耳即將惜不  
記其姓名

三國志魏書所載濟陰王思蓋濟陰人姓王名思也往

見讀史快編以思為魏宗室而濟陰乃其所封之地遂以曹為姓而直曰曹思云云其誤甚矣

吾鄉藏書之富如余四泉徐賓梧葉寅陽方孟旋徐魯人徐雲林諸先生余繩之式如昆季充棟汗牛不數惠車張乘雖余家無賜書而四十年間典衣縮食忍凍與飢而購之者大國壇坫之下稍足附江黃焉草代以來諸家所蓄散亡者不少然收合餘燼尚可成師不意此番之變雖有沒冢魯壁為之一空後來子弟誰復知有

鄴架曹倉之盛者吾願繼起之彥拓開眼界雖力不能購亦效編蒲織柳日營未見之書慎勿以劒首一呷坐井觀天而口誦芝蔴通鑑自矜博覽也

唐華原柳氏自公綽公權開家其後若仲郢若璞若桂若璧若玼皆有家法公權太醫箴玼家訓並宜錄置座右使烏衣子弟讀之母令以賣綾絹牙郎為其婢所笑明況鍾始由小吏拔為郎宣德間以三楊特薦為蘇州守宣廟賜璽書假便宜治郡政聲赫然為明時郡守之

最王晉溪曰司衡者要識拔真才而用之甲未必皆優  
於科科未必皆優於貢而甲與科貢之外又未必無奇  
才異能之士必試之以事而後可見云云歷觀況公治  
蹟益知王公此論不甚河漢或曰甲與科貢之異途自  
文章始也然即以文論而科亦有優於甲貢亦有優於  
科與甲者又不待試之以事而後見也而以一日之遇  
遂判終身卒無見根知花越格以相視者何哉余不能  
答

眉公云凡祖諱及名臣與鄉邦先達名字皆當勝帖壁上恐子孫奴隸有因而相仍者不可不慎

楚昭王時有雲如衆赤鳥夾日以飛三日楚子使問諸周太史太史曰其當王身乎若縈之可移於令尹司馬王曰除腹心之疾而置諸股肱何益不穀不有大過天其大諸有罪受罰又焉移之遂勿縈初昭王有疾卜曰河為祟王勿祭夫人請祭諸郊王曰三代命祀祭不越望江漢睢漳楚之望也禍福之至不是過也不穀雖不

德河非所獲罪也遂弗祀孔子曰楚昭王知大道矣其不失國也宜哉玄冥子曰不禳妖不祭河二事可見楚子于死生禍福理上看得十分透徹非惟可以破衆惑補世教進此便入死生不二之門矣此孔子之所以嘆為知道也

左傳國語吳越春秋越絕書史記諸書所載吳越兩國君臣情事皆若寫生而國語中夫差刼盟文種倡謀伐吳數段古藻非常讀之令人驚心動魄尤為諸作之冠

古人文字刻畫有若百鍊千鈹握槩家對之如覩三代鼎彝六朝金粉一時無色

松江徐養齋居鄉每過往還之家見陳設過盛則慘然不樂遂不舉箸或勸之則曰吾今日心齋當茹素也里中從公之化稍稍崇儉

葉文莊公水東日記云吾平日行李出入未嘗有意擇日每為同事將官中貴所懇留聞士大夫喜談星命者亦頗厭之近見富鄭公以祿命不利稱病歐陽公避五



月不上官古人乃爾豈亦未能免俗耶余性多偏文莊公所云不擇日不談星命兩事亦頗有之然自謂古人今人中相合者甚少不意文莊公早已為之矣余之瑣瑣豈敢妄效前賢但得一二同心者差可以自堅耳

明孝宗嘗問一內侍云今各衙門官每日早起朝參日間坐衙其同年同僚與故鄉新舊亦須燕會那得工夫飲酒內侍答云常是夜間飲酒孝宗曰各衙門差使缺人若是夜間飲酒騎馬醉歸那討燈燭今後各官飲酒

回家逐鋪皆要籠燈傳送兩京盡然雖風雪寒凜之夕  
半夜叫燈未嘗缺乏孝廟之體恤羣臣脩極如是然余  
以為當日各衙門官亦皆能體人主優恤臣下之意而  
兢兢守法則可耳倘因是而流湏無節則半夜叫呼民  
受其擾反為逐鋪之累矣

吾邑有廟奉景祐真君額曰忠烈幙頭金甲目睥而面  
藍襖以白圈紅點如世所扮鬼王之狀相傳以為張睢  
陽也殊可駭異嘗見桂林辨疑三事其一以為桂林屬


邑有周文王泰伯孟母漢高祖張良韓信等廟莫究所  
以及觀建武誌邕州亦有高祖廟云馬伏波征蠻酋長  
請降願朝漢天子于是立高帝廟以祠之又父老相傳  
云宋胡穎守潭專毀淫祠惟前代帝王及忠臣烈士祠  
不毀後穎轉官廣西鄉人聞風皆以淫祠易以帝王名  
臣之號幸免一時相傳至今遂不能改以其所言近理  
彼溺于淫祠者尚當省哉云云以是觀之則忠烈之稱  
或假睢陽以為名亦未可知然邑北之項山有項王廟

而四鄉野廟無不奉楚霸王像者又不知何故

宋崇寧大觀間蔡京當國設元祐正人黨籍之禁蘇文忠公文辭字畫存者悉毀之人莫敢讀其文政和中建上清寶籙宮齋醮之儀脩極誠敬徽廟每躬造焉一夕道士拜章伏地踰數刻乃起叩其故對曰適至帝所見奎宿奏事良久方畢臣始能達上帝頗嘆異問奎宿何如人其所奏何事曰所奏不可得聞言此星宿者故端明殿學士蘇軾也帝為之改容遂弛其禁友人偶談及

此謂余不信陰陽者如此等事真耶否耶余曰此道士必能敬慕蘇公者故偽其事以動帝聽不覺聳然盡改前事耳時帝奉道教方極其誠而道士伏地狀及見帝而奎宿奏事等語皆易入其耳或在事之臣有陰為此計而囑道士為之亦未可知也又常州報恩寺僧堂新成以板為壁公題寫幾遍後黨禍作凡公之遺墨所在搜毀寺僧以厚紙糊壁塗之以漆字賴以全至紹興中詔求蘇黃墨跡時僧死久矣一老頭陀知之以告郡守

除去漆紙字畫宛然臨本以進老頭陀得祠曹牒為僧  
蓋公之片辭隻字人皆愛而護焉若是道人與此僧事  
皆可傳惜不記其名也



雙橋隨筆卷十二